

Estadu TL Presiza Solidária Advogadu Bernard Collaery

Tatoli, 2 Jullu 2019



Movimentu Kontra Okupasaun Tasi Timor ka'er hela panfleitu Advogadu Bernard Collaery, iha edifisiu Asosiasaun HAK, Faról-Dili, ohin. ImajenTatoli/Florensio Miranda Ximenes

DILI, 2 jullu 2019 (TATOLI)—Movimentu Kontra Okupasaun Tasi Timor (MKOTT) husu Estadu Timor-Leste no Oitavu Governu Konstitusional liuhosi Primeiru-Ministru, Taur Matan Ruak, atu hato'o povu Timor-Leste nia solidaridade ba belun-boot Bernard Collaery ho Witness K ne'ebé hasoru hela prosesu judisiáriu no ameasa tama komarka iha Austrália tanba ko'alia lia loos.

Liuhusi konferénsia imprensa ne'ebé hala'o iha edifisiu Asosiasaun HAK, Farol-Dili, ohin, portavóz MKOTT, Moises Soares Magno, dehan Bernard Collaery hanesan advogadu Australianu ida, ne'ebé uluk fó kontribuisaun maka'as ba povu Timor-Leste (TL) nia luta ba ulun rasik-aan.

Hafoin ukun rasik-aan, nia haktuir, Bernard Collaery hola parte iha ekipa advogadu internasionál ne'ebé reperezena Timor-Leste iha kazu disputa balun hasoru governu Austrália iha Tribunál Intenasionál.

Tuir Moises, Bernard Collaery nia kliente ida naran Witness K mak ko'alia sai lia loos kona-ba atividade espionázen hosi Governu Austrália hasoru ekipa negociadór Timor-Leste sira durante negosiasaun ba tratadu *Certain Maritime Arrangements in the Timor Sea* (CMATS) iha tinan 2004.

Portavóz ne'e dehan lia loos ida ne'e Governu TL kaer nu'udar evidénsia hodi obriga Governu Austrália ba tuur iha meza atu negósia kona-ba fronteira marítima.

“Bernard Collaery ninia kontribuisaun ba tratadu fronteira marítima ne'ebé Timor-Leste ho Austrália atu ratifika iha loron 30 agustu mai ne'e boot teb-tebes,” tenik Moises.

Tanba ne'e, nia dehan, Estadu Timor-Leste no povu Timor-Leste tenke halo buat ruma atu labele husik Bernard Collaery tama kadeia tanba de'it nia ko'alia lia loos atu defende Timor-Leste nia direitu tuir lei internasionál.

Jornalista: Florensio Miranda Ximenes

Editór: Xisto Freitas